

En pia memoria dad architect Robert Decurtins, Sedrun/Trun

13.8.1975



Il di della fiesta naziunala 1975 ha in grond til funeral cumpignau il defunct, architect Robert Decurtins, al santeri de Trun. Il cerchel ded amits ed enconuschents, la simpatia dil pievel sto esser gronda, sch'in cauld di d'uost, amiez la raccolta, envida tons carstgauns ad ina sepultura. E pilver, Robert Decurtins ei staus in um dil pievel, social, amicabel, e dasperas in carstgaun dolent che capeva era muments depressivs e grevegiorts ella veta de siu concarstgaun. La veta ha purschiu al preziau defunct in bienton sulegl, sch'ins patratga surtut a sia giuventetgna ni affonza, mo per la gronda part de siu viver sto il defunct trapassar las cavorgias umbrivaunas della veta.

patertgar de siu pievel. El ha eregiu casas privatas, casas de fatschenta, casas de muntada publica.

Ins patratgi al hospezi de s. Maria sil Lucmagn, che dat veramein perdetga della capacitat digl architect, e porscha propi in decasa al stauchel pelegrin sco era a quel, che vul ira empau dad in maun per sedivertir cun ses cumpogns. El ha studegiau il problem dils vegls e dils asils. El saveva, ch'ins astgi buca senza ni hau ni mau transplantar in carstgaun dad in liug a l'auter, e quei surtut els onns de vegliadetgna. Perquei ha el concepiu siu asil de s. Martin a Trun aschia ch'el porscha als vegls in ver decasa e lai buca sentir la transplantazion violenta. Aschia ha el era patertgau, eregend danovamein igl asil s. Giusep a Cumpadials, che porscha oz ina emperneivla dimora a nos vegls. — Surtut ha el era capiu ded ereger bein e cun gust outras causas, sco ustrias, hotels etc. Ins patratgi al hotel Dulezi a Trun e siu ambient de fatschenta. Mo siu pli grond quita ha Robert Decurtins applicau per la «Casa d'affons Depuoz a Trun». Il suttascret, ensemens cun dr. Donat Cadruvi, president della commissiun de baghegiar, savein raschunar dals dis e dallas jamnas, che R. Decurtins ha studegiau e projectau quella casa. Ei se retractava de dar albiert als affons fleivels e retardai spirtalmein. A quels vuleva el dar in da casa en uorden. Ei ha fatg mal a siu sentir e patertgar architectonic mo era human, cura ch'ei vegneva tagliau naven tscheu in toc e leu destruiu siu bien concept. Per quei edifeci, ch'el duei buca veser il di d'avvertura, ha R. Decurtins bunamein unfriu sia veta. Tochen il pli davos di ha el perseguittau la lavur, dirigu il menaschi e vuliu esser orientaus tochen al pli davos detagl. Il sribent de questas lingias di al defunct: Dieus paghi.

Dapi il decembre 1974 ha il defunct architect Decurtins purtau la crusch el ver senn dil plaid. Da quella maligna attacca finala eis el buca serestabilius pli. Quei che scadina viseta admirava, fuva sia resignazion, pazienzia e vera pietu-sadad. — Mintgaton astgava el bandunlar il spital sco pauper invalid per passentar las fiastas pli grondas cun ils ses en casa paterna a Pustget. El, sco capavel architect, sco um studegiau e cultivau, ha adina preziau ils ss. sacraments ed engraziava per mintga benediczion ch'il spiritual deva ad el. Mo ils 29 de fenadur ha il Signur sur veta e mort clamau siu fideivel survient a casa elllas avdonzas celestiales. El po haver udiu: Ti has baghegiav avdonzas terrestras che dattan honour a Diu e surveschan al concarstgaun, "oz surdun jeu mia avdonza celestiala per pagaglia a ti per adina.

Architect Robert Decurtins ei naschius ils 23 de fevrier 1933 a Pustget/Trun. Ses geniturs, Giuli Decurtins e Luzia, n. Alig, han purschiu als affons ina buna educaziun cristiana, in bien spért famigliar e surtut il cauld ambient ded ina famiglia cartenta. Cheu regeva vera fidonza sin Diu ed ins mava tenor il bien principi de pli baul: Dat Dieus igl affonet, lu snega el buca il pastget. A 5 affons han quels consorts dau albriet. Quels ein oz la honur dils geniturs defuncts. — Cheu a Trun ha Robert frequentau las scolas primaras e secundaras. Quellas han buca caschunau faste-dis al mattatsch, dotaus ch'el era cun duns aparti. El serenda immediat suenter las scolas de vischnaunca egl emprendissadi e daventa miradur. Mo ussa entscheiva il temps della dolur per quei giuven carstgaun. Cun 20 onns entra el en survetsch militar sco mintga giuven swizzer saun ed en uorden. Cheu vegn el terraus dad ina infecziun en in schanugl, che dueva esser e restar la fueina de siu mal de siu suffrir e pitir tochen la mort. In onn sto el far cura a Tavau, in secund onn continuescha el quella el spital cantunal a Cuera. Ina caussa ha mai dumignau il defunct Robert, e quei ei stau sia energia, sia voluntad de fier. Empau restabilius, va el a Turitg e fa la scola de dessignader, frequenta la sera il politecnicum e conclude quellas scolas cun il diplom ded architect. Quei numrn'ins energia ed egliada el futur.

Ussa entscheiva sia lavour practica. El arva gl'emprem siu biro d'architectura a Flem, serenda lu beingleiti a Sedrun, nua ch'el secasa tochen la mort. Cun anim giuvenil e senn estetic sededichescha Robert a sia clamada. Ils 20 de matg 1962 celebrescha Robert Decurtins a Nos-sadunna della Glisch sias nozzas cun giuvna Susi Antoine, che ha schenghegiau ad el ina feglia Letizia. Quella ei veramein stada sia letezia, siu plascher, ed il maletg de quella feglia ha accumpaignau il malsaun dad in letg dil spital a l'auter.

Dapi la scola de recrut, sco menziunau, ha architect Decurtins buca gudiu sia sanadad pli. Dapi lu eis el staus in um malsaun, mo miez um, sco el scheva sez mintgaton. Mo ina caussa ha ussa teniu sidretg il capavel architect, e quei ein stai sia voluntad virila e siu cor ded aur. Pli fetg che la maligna malsogna mudergiava siu pauper tgierp, e tonpli luvrava siu spért. Las grondas ovras architectonicas ha el projectau, studegiau ed exequiu cun siu endirar continuau.

Igl onn 1971 ha el tarmess a ses amitgs e coniuvers, sco era a clients ed interessents ina mappa bein redigida che resumescha cun plaid e maletg sias ovras enteifer 10 onns. El ha luvräu dapertut, e quei per cumentientscha de sia clientella, quei ch'ins savess forsa buca constatar adina, sch'ins vesa co certs monsters vegnan tschentai viaden en nos vitgs e lavagan il maletg de quels. Decurtins ei staus precauts. Siu profund senn religius considerava enzatgei semegliont per in puccau visavi alla bellezia della natira, alla bellezia de sia patria, al sentir e

Architect Robert Decurtins ei buca pli, mo sias ovras restan e plaidan per el. Sia sepultura ei stada in di de renconuschienscha. Sur canoni Candinas ha celebrau la s. eucaristia funerala e fatg in commuentont riug, sur beneficiat Caviezel ha surdau il tgierp alla fossa e plirs spirituals han assistiu e concelebrau la s. messa funerala. Ei ha fatg impressiun de veser la bandiera della musica instrumentala de Sedrun a sgolatschond sur la fossa aviarta ed udend che quella seigi in dils davos dessegn artistics dil car defunct. Per tut, per tuts haveva el temps e peda malgrad siu tgierp malsaun, mo sia olma era sauna e siu spért veglionts. Possi sia lavour e sia via della crusch arver al car defunct la porta allas legrias celestialas e perpetnas, nua ch'el raccolta engrazievladad restonta. — El ruassi en pasch!

Sur Chr. Berther